

5236.03  
4221.8  
v.3

選文掇英  
下

BERKELEY  
LIBRARY  
UNIVERSITY OF  
CALIFORNIA





選文掇英下目錄

辯亡論上

陸士衡

辯亡論下

五等諸侯論

陸士衡

辨命論

劉孝標

廣絕交論

劉孝標

褚淵碑文

并序

王仲寶

齊故安陸昭王碑文

沈休文

讓中書監表

庾亮

為蕭楊州作薦士表

任昉

卷一百一十五  
目錄  
答臨淄侯牋

楊脩

答魏太子牋

吳質

在元城與魏太子牋

吳質

拜中軍記室辭隋王牋

謝朓

與朝歌令吳質書

魏文帝

與吳質書

魏文帝

與鍾大理書

魏文帝

與吳季重書

曹植

與滿公琰書

應璩

重答劉秣陵詔書

劉峻



思歸引序

石崇

東方朔畫像贊

并序

夏侯湛

逸民傳論

范曄

宋書謝靈運傳論

沈約

恩倖傳論

沈約

典論論文

魏文帝

吊魏武帝文

陸機

祭古塚文

謝惠連

選文掇英下目錄

選文掇英下目錄



選文掇英下

辨亡論上

陸士衡

機字

昔漢氏失御姦臣竊命禍基京畿毒徧宇內皇  
綱弛紊王室遂卑於是羣雄蜂駭義兵四合吳  
武烈皇帝慷慨下國電發荆南權略紛紜忠勇  
伯世威稜則夷羿震盪兵交則醜虜授馘遂掃  
清宗枋蒸桎皇祖于時雲興之將帶州飈起之  
師跨邑犁闢之羣風驅熊羆之衆霧集雖兵以  
義合同盟戮力然皆包藏禍心阻兵怙亂或師  
無謀律喪威稔寇忠規武節未有如此其著者



也武烈既沒長沙桓王逸才命世弱冠秀發振  
攬遺老與之述業神兵東驅奮寡犯衆攻無堅  
城之將戰無交鋒之虜誅叛柔服而江外底定  
飾法修師則威德翕赫賓禮名賢而張昭為之  
雄交御豪俊而周瑜為之傑彼二君子皆弘敏  
而多竒雅達而聰哲故同方者以類附等契者  
以氣集而江東蓋多士矣將北伐諸華誅鉏平  
紀旋皇輿於夷庚反帝座乎紫闥挾天子以令  
諸侯清天步而歸舊物戎車既次羣凶側目大  
業未就中世而殞用集我大皇帝以竒蹤襲於



逸軌、睿心因於令圖、從政咨於故實、播憲稽乎  
遺風、而加之以篤固、申之以節儉、疇咨俊茂、好  
謀善斷、束帛旅於丘園、旌命交於塗巷、故豪彥  
尋聲而響臻、志士希光而景驚、異人輻湊、猛士  
如林、於是張昭為師傅、周瑜陸公魯肅呂蒙之  
疇、入為腹心、出作股肱、甘寧凌統程普賀齊朱  
桓朱然之徒、奮其威、韓當潘璋黃蓋蔣欽周泰  
之屬、宣其力、風雅則諸葛瑾張承步騭以名聲  
光國、政事則顧雍潘濬呂範呂岱以器任幹職  
奇偉則虞翻陸績張溫張惇以諷議舉正、奉使



則趙咨沈珩以敏達延譽術數則吳範趙達以  
機祥協德董襲陳武殺身以衛主駱統劉基彊  
諫以補過謀無遺諍舉不失策故遂割據山川  
跨制荆吳而與天下爭衡矣魏氏嘗藉戰勝之  
威率百萬之師浮鄧塞之舟下漢陰之衆羽檄  
萬計龍躍順流銳騎千旅虎步原隰謨臣盈室  
武將連衡喟然有吞江澨之志一宇宙之氣而  
周瑜驅我偏師黜之赤壁喪旗亂轍僅而獲免  
收迹遠遁漢王亦憑帝王之號帥巴漢之民乘  
危騁變結壘千里志報關羽之敗圖收湘西之



地而陸公亦挫之西陵覆師敗績困而後濟絕  
命永安續以濡須之寇臨川摧銳蓬籠之戰子  
輪不反由是二邦之將喪氣挫鋒勢斲財匱而  
吳堯然坐棄其弊故魏人請好漢氏乞盟遂躋  
天號鼎峙而立西屠庸益之郊北裂淮漢之溪  
東包百越之地南括羣蠻之表於是講八代之  
禮蒐三王之樂告類上帝拱揖羣后虎臣毅卒  
循江而守長棘勁鐵望颺而奮庶尹盡規於上  
四民展業于下化協殊裔風衍遐圻乃俾一介  
行人撫巡外域巨象逸駿擾於外開明珠瑋寶

耀於內府，珍瑰重迹而至，奇玩應響而赴輜軒。聘於南荒，衝朝息於朔野，齊民免干戈之患，戎馬無晨服之虞，而帝業固矣。大皇既沒，幼主莅朝，姦回肆虐，景皇聿興，虔修遺憲，政無大闕，守文之良主也。降及歸命之初，典刑未滅，故老猶存。大司馬陸公以文武熙朝，左丞相陸凱以謇諤盡規，而施績、范慎以威重顯，丁奉、鍾離斐以武毅稱。孟宗、丁固之徒，為公卿婁玄、賀邵之屬，掌機事。元首雖病，股肱猶良，爰及末葉，羣公既喪，然後黔首有瓦解之患，皇家有土崩之憂。曆



命應化而徵王師躡運而發卒散於陣民奔于  
邑城池無藩籬之固山川無溝阜之勢非有工  
輸雲梯之械智伯灌激之害楚子築室之圍燕  
人濟西之隊軍未浹辰而社稷夷矣雖忠臣孤  
憤烈士死節將奚救哉夫曹劉之將非一世所  
選向時之師無曩日之衆戰守之道抑有前符  
險阻之利俄然未改而成敗貿理古今詭趣何  
哉彼此之化殊授任之才異也

### 辯亡論下

昔三方之王也魏人據中夏漢氏有岷益吳制

荆楊而掩交廣曹氏雖功濟諸華虐亦深矣其  
民怨矣劉公因險以飾智功已薄矣其俗陋矣  
夫吳桓王基之以武太祖成之以德聰明睿達  
懿度弘遠矣其求賢如不及卹民如稚子接士  
盡盛德之容親仁罄丹府之愛拔呂蒙於戎行  
識潘濬於係虜推誠信士不恤人之我欺量能  
授器不患權之我偏執鞭鞠躬以重陸公之威  
悉委武衛以濟周瑜之師卑宮菲食以豐功臣  
之賞披懷虛己以納謨士之筭故魯肅一面而  
自託士燮蒙險而致命高張公之德而省遊田



之娛賢諸葛之言而割情欲之歡感陸公之規  
而除刑法之煩竒劉基之議而作三爵之誓屏  
氣跼蹐以伺子明之疾分滋損甘以育凌統之  
孤登壇慷慨歸魯子之功削投惡言信子瑜之  
節是以忠臣競盡其謀志士咸得肆力洪規遠  
略固不厭夫區區者也故百官苟合庶務未遑  
初都建業羣臣請備禮秩天子辭而不許曰天  
下其謂朕何宮室與服蓋慙如也爰及中葉天  
人之分既定百度之缺粗脩雖釀化懿綱未齒  
乎上代抑其體國經民之具亦足以為政矣地

方幾萬里帶甲將百萬其野沃其兵練其器利  
其財豐東負滄海西阻險塞長江制其區宇峻  
山帶其封域國家之利未巨有私於茲者矣借  
使中才守之以道善人御之有術敦率遺典勤  
民謹政循定策守常險則可以長世永年未有  
危亡之患也或曰吳蜀唇齒之國蜀滅則吳亡  
理則然矣夫蜀蓋藩援之與國而非吳人之存  
亡也何則其郊境之接重山積險陸無長轂之  
徑川阨流迅水有驚波之艱雖有銳師百萬啓  
行不過千夫舳艫千里前驅不過百艦故劉氏



之伐陸公喻之長蛇其勢然也昔蜀之初亡朝  
臣異謀或欲積石以險其流或欲機械以御其  
變天子總羣議而諮之大司馬陸公以四瀆天  
地之所以節宣其氣固無可遏之理而機械則  
彼我之所共彼若棄長技以就所屈即荆楊而  
爭舟楫之用是天資我也將謹守峽口以待禽  
耳逮步闡之亂憑寶城以延強寇重資幣以誘  
羣蠻于時大邦之衆雲翔電發懸旌江介築壘  
遵渚襟帶要害以止吳人之西而巴漢舟師沿  
江東下陸公以偏師三萬北據東坑深溝高壘

案甲養威反虜蹤跡待戮而不敢北窺生路彊  
寇敗績宵遁喪師太半分命銳師五千西禦水  
軍東西同捷獻俘萬計信哉賢人之謀豈欺我  
哉自是烽燧罕警封域寡虞陸公歿而潛謀非  
吳釁深而六師駭夫太康之役衆未盛乎曩日  
之師廣州之亂禍有愈乎向時之難而邦家顛  
覆宗廟為墟嗚呼人之云亡邦國殄瘁不其然  
與易曰湯武革命順乎天玄曰亂不極則治不  
形言帝王之因天時也古人有言曰天時不如  
地利易曰王侯設險以守其國言為國之恃險



也又曰地利不如人和在德不在險言守險之  
由人也吳之興也參而由焉孫卿所謂合其參  
者也及其亡也恃險而已又孫卿所謂舍其參  
者也夫四州之氓非無衆也大江之南非乏俊  
也山川之險易守也勁利之器易用也先政之  
策易循也功不興而禍遘者何哉所以用之者  
失也是故先王達經國之長規審存亡之至數  
謙己以安百姓敦惠以致人和寬冲以誘俊又  
之謀慈和以結士民之愛是以其安也則黎元  
與之同慶及其危也則兆庶與之共患安與衆

同慶則其危不可得也危與下共患則其難不足恤也夫然故能保其社稷而固其土宇麥秀無悲殷之思黍離無愍周之感矣

五等諸侯論

陸士衡

夫體國經野先王所慎創制垂基思隆後葉然而經略不同長世異術五等之制始於黃唐郡縣之治創自秦漢得失成敗備在典謨是以其詳可得而言夫先王知帝業至重天下至曠曠不可以偏制重不可以獨任任重必於借力制曠終乎因人故設官分職所以輕其任也並建



五長所以弘其制也於是乎立其封疆之典裁其親疎之宜使萬國相維以成盤石之固宗庶雜居而定維城之業又有以見綏世之長御識人情之大方知其為人不如厚己利物不如圖身安上在於悅下為己在乎利人故易曰說以使民民忘其勞孫卿曰不利而利之不如利而後利之之利也是以分天下以厚樂而已得與之同憂饗天下以豐利而我得與之共害利博則恩篤樂遠則憂深故諸侯享食土之實萬國受世及之祚矣夫然則南面之君各務其治九

服之民知有定主上之子愛於是乎生下之體  
信於是乎結世治足以敦風道衰足以御暴故  
強毅之國不能擅一時之勢雄俊之士無所寄  
霸王之志然後國安由萬邦之思治主尊賴羣  
后之圖身譬猶衆目營方則天網自昶四體辭  
難而心膺獲又三代所以直道四王所以垂業  
也夫盛衰隆弊理所固有教之廢興繫乎其人  
愿法期於必諒明道有時而闇故世及之制弊  
於彊禦厚下之典漏於末折侵弱之疊遘自三  
季陵夷之禍終于七雄昔者成湯親照夏后之



鑒公旦目涉商人之戒文質相濟損益有物故  
五等之禮不革于時封畛之制有隆焉爾者豈  
玩二王之禍而闇經世之筭乎固知百世非可  
懸御善制不能無弊而侵弱之辱愈於殄祀土  
崩之困痛於陵夷也是以經始權其多福慮終  
取其少禍非謂侯伯無可亂之府郡縣非致治  
之具也故國憂賴其釋位主弱憑其翼戴及承  
微積弊王室遂卑猶保名位祚垂後嗣皇統幽  
而不輟神器否而必存者豈非置勢使之然與  
降及亡秦棄道任術懲周之失自矜其得尋斧

始於所庇制國昧於弱下國屢獨饗其利主憂  
莫與共害雖速亡趣亂不必一道顛沛之釁實  
由孤立是蓋思五等之小怨忘萬國之大德知  
陵夷之可患閭土崩之為痛也周之不競有自  
來矣國乏令主十有餘世然片言勤王諸侯必  
應一朝振矜遠國先叛故彊晉收其請隧之圖  
暴楚頓其觀鼎之志豈劉項之能闚關勝廣之  
敢號澤哉借使秦人因循周制雖則無道有與  
共弊覆滅之禍豈在曩日漢矯秦枉大啓侯王  
境土踰溢不遵舊典故賢生憂其危鼂錯痛其



亂是以諸侯阻其國家之富憑其士民之力勢足者反疾土狹者逆遲六臣犯其弱綱七子衝其漏網皇祖夷於黥徙西京病於東帝是蓋過正之災而非建侯之累也然呂氏之難朝士外顧宋昌策漢必稱諸侯逮至中葉忌其失節割削宗子有名無實天下曠然復襲亡秦之軌矣是以五侯作威不忌萬邦新都襲漢易於拾遺也光武中興纂隆皇統而猶遵覆車之遺轍養喪家之宿疾僅及數世姦究充斥卒有彊臣專朝則天下風靡一夫縱衡則城池自夷豈不危

我在周之衰、難興王室、故命者七臣、千位者三子、嗣王委其九鼎、凶族據其天邑、鉦聲震於閭宇、鋒鏑流乎絳闕、然禍止畿甸、害不覃及天下、晏然以治待亂、是以宣王興於共和、襄惠振於晉鄭、豈若二漢階閭、整擾而四海已沸、孽臣朝入而九服夕亂哉、遠惟王莽篡逆之事、近觀董卓擅權之際、億兆悼心、愚智同痛、然周以之存、漢以之亡、夫何故哉、豈世乏曩時之臣士、無匡合之志歟、蓋遠績屈於時、異雄心挫於卑勢耳、故烈士扼腕、終委冠讎之手、中人變節、以助虐



國之禁雖後時有鳩合同志以謀王室然上非  
與主下皆市人師旅無先定之班君臣無相保  
之志是以義兵雲合無救劫弑之禍民望未改  
而已見大漢之滅矣或以諸侯世位不必常全  
昏主暴君有時比跡故五等所以多亂今之牧  
守皆以官方庸能雖或失之其得固多故郡縣  
易以為治夫德之休明黜陟日用長率連屬咸  
述其職而淫昏之君無所容過何則其不治哉  
故先代有以之興矣苟或衰陵百度自悖鬻官  
之吏以貨準才則貪殘之氓皆如羣后也安在

其不亂哉故後王有以之廢矣且要而言之五  
等之君為已思治郡縣之長為利圖物何以徵  
之蓋企及進取仕子之常志脩已安民良士之  
所希及夫進取之情銳而安民之譽遲是故侵  
百姓以利已者在位所不憚損實事以養名者  
官長所夙夜君無卒歲之圖臣挾一時之志五  
等則不然知國為已士衆皆我民民安已受其  
利國傷家嬰其病故前人欲以垂後後嗣思其  
堂構為上無苟且之心羣下知膠固之義使其  
並賢居治則功有厚薄兩愚處亂則過有深淺



然則八代之制、幾可以一理貫、秦漢之典、殆可以一言蔽矣。

辨命論

劉孝標

主上嘗與諸名賢言及管輅歎其有奇才而位不達、時有在赤墀之下、豫聞斯議、歸以告余、余謂士之窮通、無非命也、故謹述天旨、因言其致云爾。

臣觀管輅、天才英偉、瑤璋特秀、實海內之名傑、豈日者卜祝之流乎、而官止少府丞、年終四十八、天之報施、何其寡歟、然則高才而無貴仕、養

餐而居大位自古所歎焉獨公明而已哉故性命之道窮通之數天關紛綸莫知其辨仲任蔽其源子長闡其惑至於鶡冠甕牖必以縣天有期鼎貴高門則曰唯人所召譊譊謹咋異端斯起蕭遠論其本而不暢其流子玄語其流而未詳其本嘗試言之曰夫通生萬物則謂之道生而無主謂之自然自然者物見其然不知所以然同焉皆得不知所以得鼓動陶鑄而不為功庶類混成而非其力生之無亭毒之心死之豈度劉之志墜之淵泉非其怒升之霄漢非其悅



蕩乎大乎萬寶以之化確乎純乎一作而不易  
化而不易則謂之命命也者自天之命也定於  
冥兆終然不變鬼神莫能預聖哲不能謀觸山  
之力無以抗倒日之誠不能感短則不可緩之  
於寸陰長則不可急之於箭漏至德未能踰上  
智所不免是以放勛之世浩浩襄陵天乙之時  
焦金流石文公噫其尾宣尼絕其糧顏回敗其  
叢蘭冉耕歌其采芣夷叔斃淑媛之言子輿困  
臧倉之訴聖賢且猶若此而况庸庸者乎至乃  
伍員浮屍於江流三閭沉骸於湘渚賈大夫沮

志於長沙馮都尉皓髮於郎署君山鳴漸鐵羽  
儀於高雲敬通鳳起摧迅翻於風穴此豈才不  
足而行有遺哉近世有沛國劉獻獻弟璡並一  
時秀士也獻則關西孔子通涉六經循循善誘  
服膺儒行璡則志烈秋霜心貞崑玉亭亭高竦  
不雜風塵皆毓德於衡門並馳聲於天地而官  
有微於侍郎位不登於執戟相次殂落宗祀無  
饗因斯兩賢以言古則昔之玉質金相英髦秀  
達皆擯斥於當年韞奇才而莫用俟草木以共  
彫與麋鹿而同死膏塗平原骨填川谷堙滅而



無聞者豈可勝道哉此則宰衡之與皂隸容彭  
之與殤子猗頓之與黔婁陽文之與敦洽咸得  
之於自然不假道於才智故曰死生有命富貴  
在天其斯之謂矣然命體周流變化非一或先  
號後笑或始吉終凶或不召自来或因人以濟  
交錯糾紛迴還倚伏非可以一理徵非可以一  
途驗而其道密微寂寥忽恍無形可以見無聲  
可以聞必御物以效靈亦憑人而成象譬天王  
之冕旒任百官以司職而或者覩湯武之龍躍  
謂龕亂在神功聞孔墨之挺生謂英睿擅奇響

視彭韓之豹變謂鷙猛致人爵見張桓之朱紱  
謂明經拾青紫豈知有力者運之而趨乎故言  
而非命有六蔽焉爾請陳其梗槩夫靡顏臆理  
哆嚙鷓頰形之異也朝秀晨終龜鵠千歲年之  
殊也聞言如響智昏菽麥神之辨也同知三者  
定乎造化榮辱之境獨曰由人是知二五而未  
識於十其蔽一也龍犀日角帝王之表河目龜  
文公侯之相撫鏡知其將刑歷紐顯其膺錄星  
虹樞電昭聖德之符夜哭聚雲鬱興王之瑞皆  
兆發於前期渙汗於後葉若謂驅貔虎奮尺劍



入紫微升帝道則未達宵冥之情未測神明之  
數其蔽二也空桑之里變成洪川歷陽之都化  
為魚鼈楚師屠漢卒睢河鯁其流秦人坑趙士  
沸聲若雷震火炎崑岳礫石與琬琰俱焚嚴霜  
夜零蕭艾與芝蘭共盡雖游夏之英才伊顏之  
殆庶焉能抗之哉其蔽三也或曰明月之珠不  
能無類夏后之璜不能無考故亭伯死於縣長  
相如卒於園令才非不傑也主非不明也而碎  
結綵之鴻輝殘懸黎之夜色抑尺之量有短哉  
若然者主父偃公孫弘對策不升第歷說而不

入牧豕淄原見棄州部設令忽如過隙渣死霜  
露其為詬耻豈崔馬之流乎及至開東閣列五  
鼎電照風行聲馳海外寧前愚而後智先非而  
終是將榮悴有定數天命有至極而謬生妍蚩  
其蔽四也夫虎嘯風馳龍興雲屬故重華立而  
元凱升辛受生而飛廉進然則天下善人小惡  
人多闇主衆明君寡而薰蕕不同器梟鸞不接  
翼是使渾敦擣杙踵武於雲臺之上仲容庭堅  
耕耘於巖石之下橫謂廢興在我無繫於天其  
蔽五也彼戎狄者人面獸心宴安鴆毒以誅殺



為道德以蒸報為仁義雖大風立於青丘鑒霜  
奮於華野比於狼戾曾何足喻自金行不競天  
地叛蕩左帶沸唇乘間電發遂覆漚洛傾五都  
居先王之桑梓竊名號於中縣與三皇競其眠  
黎五帝角其區宇種落繁熾充牣神州嗚呼福  
善禍淫徒虛語耳豈非否泰相傾盈縮遞運而  
汨之以人其蔽六也然所謂命者死生焉貴賤  
焉貧富焉治亂焉禍福焉此十者天之所賦也  
愚智善惡此四者人之所行也夫神非舜禹心  
異朱均才絳中庸在於所習是以素絲無恒玄

黃代起鮑魚芳蘭入而自變故季路學於仲尼  
厲風霜之節楚穆謀於潘崇成弑逆之禍而商  
臣之惡盛業光於後嗣仲由之善不能息其結  
纓斯則邪正由於人吉凶在乎命也或以鬼神  
害盈皇天輔德故宋公一言法星三徙殷帝自  
翦千里來雲若使善惡無徵未洽斯義且于公  
高門以待封嚴毋掃墓以望喪此君子所以自  
彊不息也如使仁而無報奚為修善立名乎斯  
徑廷之辭也夫聖人之言顯而晦微而婉幽遠  
而難聞河漢而不測或立教以進庸怠或言命



以窮性靈積善餘慶立教也鳳鳥不至言命也  
今以其片言辯其要趣何異乎夕死之類而論  
春秋之變哉且荆昭德音丹雲不卷周宣祈雨  
主璧斯罄于叟種德不逮勛華之高延年殘穢  
朱甚東陵之酷為善一為惡均而禍福異其流  
慶興殊其迹蕩蕩上帝豈如是乎詩云風雨如  
晦鷄鳴不已故善人為善焉有息哉夫食稻粱  
進芻豢衣狐貉襲冰紈觀窈眇之奇舞聽雲和  
之琴瑟此小人之所急非有求而為也修道德  
習仁義敦孝悌立忠貞漸禮樂之腴潤縮先王

之盛則此君子之所急非有求而為也然則君子居正體道樂天知命明其無可奈何識其不由智力逝而不召來而不距生而不喜死而不感瑤臺夏屋不能悅其神土室編蓬未足憂其慮不充訕於富貴不遑遑於所欲豈有史公董相不遇之文乎

廣絕交論

劉孝標

客問主人曰朱公叔絕交論為是乎為非乎主人曰客奚此之問客曰夫草蟲鳴則阜螽躍騅虎嘯而清風起故網緼相感霧涌雲蒸嚶鳴相



召星流電激是以王陽登則貢公喜罕生逝而  
國子悲且心同琴瑟言鬱郁於蘭茝道叶膠漆  
志婉孌於墳荒聖賢以此鏤金版而鐫盤盂書  
玉牒而刻鍾鼎若乃匠人輟成風之妙巧伯子  
息流波之雅引范張款款於下泉尹班陶陶於  
永夕駱驛縱橫烟霏雨散巧歷所不知心計莫  
能測而朱益州汨彞叙粵謨訓捶直切絕交游  
比黔首以鷹鷂嬖人靈於豺虎蒙有猜焉請辨  
其惑主人听然而笑曰客所謂撫絃徽音未達  
燥濕變響張羅沮澤不覩鴻鴈雲飛蓋聖人握

金鏡闡風烈龍驤蜺屈從道汙隆日月聯輝賢  
亶亶之弘致雲飛電薄顯棣華之徽旨若五音  
之變化濟九成之妙曲此朱生得玄珠於赤水  
謨神曆而為言至夫組織仁義琢磨道德驩其  
愉樂恤其陵夷寄通靈臺之下遺迹江湖之上  
風雨急而不輟其音霜雪零而不渝其色斯賢  
達之素交歷萬古而一遇逮叔世民訛狙詐騰  
起谿谷不能踰其險鬼神無以究其變競毛羽  
之輕趨錐刀之末於是素交盡利交興天下蚩  
蚩鳥驚雷駭然則利交同源派流則異較言其



略有五術焉。若其寵鈞董石，權壓梁竇，雕刻白  
工鑪，播萬物吐漱，興雲雨，呼翕下霜露，九域聳  
其風塵，四海疊其燠灼，靡不望影星奔，藉響川  
驚。鷄人始唱，鶴蓋成陰，高門旦開，流水接軫，皆  
願摩頂至踵，隳膽抽腸，約同要離，焚妻子，誓殉  
荆卿。湛宗族，是曰勢交；其流一也。富埒陶白，貲  
巨程羅，山擅銅陵，家藏金穴，出平原而聯騎，居  
里閭而鳴鍾，則有窮巷之賓，繩樞之子，冀宵燭  
之末光，邀潤屋之微澤，魚貫鳬躍，颯沓鱗萃，分  
鴈鷺之稻粱，霑玉笋之餘瀝，銜恩賜，進款誠，接

青松以示心指白水而旌信是曰賄交其流二也陸大夫宴喜西都郭有道人倫東國公卿貴其籍甚搢紳羨其登仙加以顙頤蹙頞涕唾流沫騁黃馬之劇談縱碧鷄之雄辯叙溫郁則寒谷成暄論嚴苦則春叢零葉飛沉出其顧指榮辱定其一言於是有弱冠王孫綺紈公子道不挂於通人聲未遁於雲閣攀其鱗翼丐其餘論附駟驥之旄端軼歸鴻於碣石是曰談交其流三也陽舒陰慘生民大情憂合驩離品物恒性故魚以泉涸而喁沫鳥因將死而鳴哀同病相



憐綴河上之悲曲恐悵寔懷昭谷風之盛典斯  
則斷金由於湫隘刎頸起於苦蓋是以伍員濯  
漑於宰嚭張王撫翼於陳相是曰窮交其流四  
也馳驚之倫澆薄之俗無不操權衡秉纖纊衡  
所以揣其輕重纊所以屬其鼻息若衡不能舉  
纊不能飛雖顏冉龍翰鳳雛曾史蘭薰雪白舒  
向金玉淵海卿雲黼黻河漢視若游塵遇同土  
梗莫肯費其半菽罕有落其一毛若衡重鎔銖  
纊微影撒雖共工之蒐慝驩堯之掩義南荆之  
跋扈東陵之巨猾皆為匍匐逶迤折枝祗痔金

膏翠羽將其意脂韋便辟導其誠故輪蓋所勝  
必非夷惠之室苞苴所入實行張霍之家謀而  
後動毫芒寡忒是曰量交其流五也凡斯五交  
義同賈鬻故桓譚譬之於闌闌林回諭之於甘  
醴夫寒暑遞進盛衰相襲或前榮而後悴或始  
富而終貧或初存而末亡或古約而今泰循環  
翻覆迅若波瀾此則殉利之情未嘗異變化之  
道不得一由是觀之張陳所以凶終蕭朱所以  
隙末斷焉可知矣而翟公方規規然勒門以箴  
客何所見之晚乎因此五交是生三釁敗德殄



義禽獸相若一釁也難回易攜讎訟所聚二釁  
也名陷饕餮貞介所羞三釁也古人知三釁之  
為梗懼五交之速尤故王丹威子以櫝楚朱穆  
昌言而示絕有旨哉有旨哉近世有樂安任昉  
海內髦傑早綰銀黃夙昭民譽道文麗藻方駕  
曹王英特俊邁聯橫許郭類田文之愛客同鄭  
莊之好賢見一善則盱衡扼腕遇一才則揚眉  
抵掌雌黃出其唇吻朱紫由其月旦於是冠蓋  
輻湊衣裳雲合輜輶擊轡坐客恒滿蹈其閭闔  
若升闕里之堂入其隩隅謂登龍門之阪至於

顧眄增其倍價剪拂使其長鳴影組雲臺者摩  
肩趨走丹墀者疊跡莫不締恩狎結綢繆想惠  
莊之清塵庶羊左之徽烈及瞑目東粵歸骸洛  
浦總帳猶懸門罕漬酒之彥墳未宿草野絕動  
輪之賓藐爾諸孤朝不謀夕流離大海之南寄  
命瘴癘之地自昔把臂之英金蘭之友曾無羊  
舌下泣之仁寧慕郇成分宅之德嗚呼世路險  
巇一至於此太行孟門豈云嶄絕是以耿介之  
士疾其若斯裂裳裹足棄之長驚獨立高山之  
頂歡與麋鹿同羣皦皦然絕其零濁誠耻之也



誠畏之也

褚淵碑文并序

王仲寶

夫太上有立德其次有立功此之謂不朽所以  
子產云亡宣尼泣其遺愛隨武既沒趙文懷其  
餘風於文簡公見之矣公諱淵字彥回河南陽  
翟人也微子以至仁開基宋段以功高命氏爰  
逮兩漢儒雅繼及魏晉以降奕世重暉乃祖太  
傅元穆公德合當時行比州壤深識臧否不以  
毀譽形言亮采王室每懷冲虛之道可謂婉而  
章志而晦者矣自茲厥後無替前規建官惟賢

軒冕相襲公稟川嶽之靈眸含瑤璋而挺曜和  
順內凝英華外發神茂初學業隆弱冠是以仁  
經義緯敦穆於閨庭金聲玉振寥亮於區宇孝  
敬淳深率由斯至盡歡朝夕人無間言逍遙乎  
文雅之囿翱翔乎禮樂之場風儀與秋月齊明  
音徽與春雲等潤韻宇弘深喜愠莫見其際心  
明通亮用言必猶於已汪汪焉洋洋焉可謂澄  
之不清撓之不濁袁陽源才氣高竒綜覈精裁  
宋文帝端明臨朝鑒賞無昧袁既延譽於遐邇  
文亦定婚於皇家選尚餘姚公主拜駙馬都尉



漢結叔高哥姻武子方斯茂如也釋褐著作佐  
郎轉太子舍人濯纓登朝冠冕當世升降兩宮  
實惟時寶具瞻之範既著台衡之望斯集出參  
太宰軍事入為太子洗馬俄遷祕書丞贊道槐  
庭司文天閣光昭諸侯風流籍甚以父憂去職  
喪過乎哀幾將毀滅有識留感行路傷情服闋  
除中書侍郎王言如絲其出如綸恪居官次智  
效惟穆于時新安王寵冠列蕃越敷邦教毗佐  
之選妙盡國華出為司徒右長史轉尚書吏部  
郎執銓以平御煩以簡裴楷清通王戎簡要復

存於茲泰始之初入為侍中曾不移朔遷吏部  
尚書是時天步初夷王途尚阻元戎啓行衣冠  
未緝內資謀謨外康流品制勝既遠涇渭斯明  
賞不失勞舉無失德績簡帝心聲敷物聽事寧  
領太子右衛率固讓不拜尋領驍騎將軍以帷  
幄之功膺庸祗之秩封零都縣開國伯食邑五  
百戶既秉辭梁之分又懷寢丘之志所受田邑  
不盈百井久之重為侍中領右衛將軍盡規獻  
替均山甫之庸緝熙王旅兼方叔之望丹陽京  
輔遠近攸則吳興衿帶實惟股肱頻作二守並



加蟬冕政以禮成民是以息明皇不豫儲后幼  
冲貽厥之寄允屬時望徵為吏部尚書領衛尉  
固讓不拜改授尚書右僕射端流平衡外寬內  
直弘二八之高譽宣由庚而垂詠太宗即世遺  
命以公為散騎常侍中書令護軍將軍送往事  
居忠貞允亮秉國之均四方是維百官象物而  
勤軍政不戒而備公之尹太階而登天下君子  
以為美談亦猶孟軻致欣於樂正羊職悅賞於  
士伯者也丁所生毋憂謝職毀疾之重因心則  
至朝議以有為為之魯侯垂式存公忘私方進

明准爰降詔書敦還攝任固請移歲表奏相望  
事不我與屈已弘化屬值三季在辰盛蕃內侮  
桂陽失圖窺窬神器鼓棹則滄波振蕩建旗則  
日月蔽虧出江沅而風翔入京師而雷動鳴控  
弦於宗稷流鋒鏃於象魏雖英宰臨戎元渠時  
殄而餘黨寔繁宮廟憂偏公乃撓熊羆之師率  
不貳心之臣戮力盡規克寧禍亂康國祚於綴  
旒拯王維於已墜誠由太祖之威風抑亦仁公  
之翼佐可謂德刑詳禮義信戰之器也以靜難  
之功進爵為侯兼授尚書令中軍將軍給班劍



二十人功成弗有固秉撝挹改授侍中中書監  
護軍如故又以居母艱去官雖事緣義感而情  
均天屬顏丁之合禮二連之善喪亦曷以踰天  
厭宋德水運告謝嗣主荒怠於天位彊臣憑陵  
於荆楚廢昏繼統之功龕亂寧民之德公實仰  
贊宏規參聞神算雖無受脤出車之庸亦有甘  
寢秉羽之績乃作司空山川攸序兼授衛軍戎  
政輯睦既而齊德龍興順皇高禪深達先天之  
運匡贊奉時之業弼諧允正微猷弘遠樹之風  
聲著之話言亦猶稷契之臣虞夏荀裴之奉魏

晉自非坦懷至公永監崇替孰能光輔吾君寅  
亮二代者哉大啓南康爰登中鉉時膺土宇固  
辭邦教今之尚書今古之冢宰雖秩輕於冢司  
而任隆於百辟慙遂冲旨改授朝端通無異言  
遠無異望帝嘉茂庸重申前冊執五禮以正民  
簡八刑而罕用故能騁績康衢延慈哲后義在  
資敬情同布衣出陪鑾躅入奉帷殿仰南風之  
高詠餐東野之秘寶雅議於聽政之晨彼文於  
宴私之夕參以酒德間以琴心曠有餘暉遙然  
留想君垂冬日之溫臣盡秋霜之戒肅肅焉穆



穆焉於是見君親之同致知在三之如一太祖  
升遐綢繆遺寄以侍中司徒錄尚書事稟玉几  
之顧奉綴衣之禮擇皇齊之令典致聲化於雍  
熙內平外成實昭舊職增給班劔三十人物有  
其容徽章斯允位尊而禮卑居高而恩降自夏  
徂秋以疾陳退朝廷重違謙光之旨用申超世  
之尚改授司空領驃騎大將軍侍中錄尚書如  
故景命不永大漸彌留建元四年八月二十一  
日薨于私第春秋四十有八昔柳莊疾棘衛君  
當祭而輟禮晏嬰既往齊君趨車而行哭公之

云亡聖朝震悼於上羣后惟慟於下豈惟哀纏  
一國痛深一主而已哉追贈太宰侍中錄尚書  
事如故給節羽葆鼓吹增班劔為六十人謚曰  
文簡禮也夫乘德而處萬物不能害其貞虛已  
以遊當世不能擾其度均貴賤於條風忘榮辱  
於彼我然後可以無善天下聊以卒歲經始  
終式免祗悔誰云克備公實有焉是以義結君  
子惠霑庶類言象所未形述詠所不盡故更其  
甲冑感逝川之無捨哀清暉之眇默餐輿誦於  
丘里瞻雅詠於京國思衛鼎之垂文想晉鍾之



遺則方高山而仰止刊玄石以表德其辭曰辰  
精感運昂靈發祥元首惟明股肱惟良天監璿  
曜踵武前王欽若元輔體微知章永言必孝因  
心則友仁洽兼濟愛深善誘觀海齊量登嶽均  
厚五臣兼六八元斯九內謨帷幄外曜台階遠  
無不肅通無不懷如風之偃如樂之諧光我帝  
典緝彼民黎率禮蹈謙諒實身幹跡屈朱軒志  
隆衡館眇眇玄宗萋萋辭翰義既川流文亦霧  
散嵩構云頽梁陰載缺德猷靡嗣儀形長逝惆  
悵餘徽鏘洋遺烈久而彌新用而不竭

齊故安陸昭王碑文

沈休文

公諱緬字景業南蘭陵人也稷契身佐唐虞有大功於天地商武姬文所以膺圖受籙蕭曹扶翼漢祖滅秦項以寧亂魏氏乘時於前皇齊握符於後靈源與積石爭流神基與極天比峻祖宣皇帝雄才盛烈名蓋當時考景皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久遠大之方率由斯至挹其源者游泳而莫測懷



其道者日用而不知昭昭若三辰之麗于天滔  
滔猶四瀆之記于地六幽允洽一德無爽萬物  
仰之而彌高千里不言而斯應若夫彈冠出仕  
之日登庸蒞事之年軍麾命服之序監督方部  
之數斯回國史之所詳今可得而略也水德方  
衰天命未改太祖龍躍俟時作鎮淮泗如仁夕  
惕之志中夜九迴龕世拯亂之情獨用懷抱深  
圖密慮衆莫能窺公陪奉朝夕從容左右蓋同  
王子洛濱之歲實惟辟彊內侍之年起予聖懷  
發言中旨始以文學遊梁俄而入掌綸誥蘭桂

有芬清暉自遠帝出于震日衣青光方執茅社  
俾侯安陸受瑞析珪遂荒雲野式掌儲命帝難  
其人公以宗室羽儀允膺嘉選協隆三善仰敷  
四德博望之苑載暉龍樓之門以峻獻替帷扆  
實掌喉唇奉待漏之書銜如絲之旨前暉後光  
非止恒授公以密戚上賢俄而奉職出納惟允  
劔璽增華伊昔帝唐九官咸事熊豹臨戲納言  
是司自此迄今其任無爽爰自近侍式賁權衡  
而皇情眷眷慮深求瘼姑蘇粵壤任切關河都  
會殷阜提封百萬全趙之袷服叢臺方此為劣



臨淄之揮汗成雨曾何足稱乃鴻鵠舊吳作守  
東楚弘義讓以勗君子振平慧以字小人撫同  
上德綏用中典疑獄得情而弗喜宿訟兩讓而  
同歸雖春申之大啓封疆鄧攸之緝熙氓庶不  
能尚也夏首藩要任重推轂衿帶中流地殷江  
漢南接衡巫風雲之路千里西通鄠鄧水陸之  
塗三七是惟形勝閭外莫先建麾作牧明德攸  
在乃暴以秋陽威以夏日澤無不漸螻蟻之穴  
靡遺明無不察容光之微必照由近而被遠自  
已而及物惠與八風俱翔德與五才並運遠無

不懷通無不肅邑居不聞夜吠之犬牧人不覩  
晨飲之羊譽表六條功最萬里還居近侍兼饗  
戎秩侯府寄隆儲端任顯東西兩晉茲選特難  
羊琇願言而匪獲謝琰功高而後至升降二宮  
令績斯俟禁旅尊嚴主器彌固禹穴神臯地埒  
分陝江左以來常遽斯任東渚鉅海南望秦稽  
淵藪胥萃藿蒲攸在貨殖之民千金比室郭壠  
之內雲屋萬家刑政繁舛舊難詳一南山羣盜  
未足云多渤海亂繩方斯易理公下車敷化風  
動神行誠恕既孚鈞距靡用不待赭汙之權而



姦渠必翦無假里端之籍而惡子咸誅被以哀  
矜孚以信順南陽葦杖未足比其仁潁川時雨  
無以豐其澤公攬轡升車牧州典郡感達民祇  
非待期月老安少懷塗歌里詠莫不歡若親戚  
芬若椒蘭麾旆每反行悲道泣攀車卧轍之戀  
爭塗忘遠去思一借之情愈久彌結方城漢池  
南顧莫重北指嶠潼平塗不過七百西接堯武  
關路曾不盈千蠻陲夷徼重山萬里小則俘民  
略畜大則攻城剽邑晉宋迄今有切民患烽鼓  
相望歲時不息推埋穿掘之黨阡陌成羣傲法

侮吏之入曾莫禁禦累藩咸受其弊歷政所不  
能裁加以戎羯窺窬伺我邊隙北風未起馬首  
便以南向塞草未衰嚴城於焉早閉永明八載  
疆場大駭天子乃心北眷聽朝不怡揚旆漢南  
非公莫可於是驅馬原隰卷甲遄征威令首塗  
仁風載路軌躅清晏車徒不擾牛酒日至壺漿  
塞陌失義犬羊其來久矣徵賦嚴功唯利是求  
首鼠疆界災蠹彌廣公扇以廉風孚以誠德盡  
任棠置水之情弘郭伋待期之信金如粟而弗  
覩馬如羊而靡入雛雉必懷豚魚不棄由是傾



巢舉落望德如歸椎髻髻首日拜門闕卉服滿  
塗夷歌成韻禮義既敷威刑具舉彊民獷俗反  
志遷情風塵不起圉圉寂寞富商野次宿秉停  
蓄蜾蝗弗起豺虎遠跡北狄懼威關塞謐靜偵  
謀不敢東窺駝馬不敢南牧方欲振策燕趙席  
卷秦代陪龍駕於伊洛侍紫蓋於咸陽而遵疾  
彌留歟焉大漸耕夫釋耒桑婦下機參請門衢  
並走羣望維永明九年夏五月三十日辛酉薨  
春秋三十有七城府颯然庶僚如賓男女老幼  
大臨街衢接響傳聲不踰時而達于四境夷羣

戎落幽遠必至望城拊膺震動邠邑並求入奉  
靈輓藩司抑而不許雖鄧訓致臂面之哀羊公  
深罷市之慕對而為言遠有慙德神駕東還號  
送踰境奉觴奠以望靈仰蒼天而自訴震響成  
雷盈塗咽水公臨危審正載貽話言楚囊之情  
惟幾而彌固衛魚之心身亡而意結二宮軫慟  
遐通同哀追贈侍中領衛將軍給鼓吹一部謚  
曰昭侯時皇上納麓在辰登庸伊始允副朝端  
兼掌屯衛聞凶哀震感絕移時因遘沉痾絲留  
氣序世祖日夜憂懷備盡寬譬勉膳禁哭中使



相望上雖外順皇旨內殷私痛獨居不御酒肉  
坐卧泣涕霑衣若此移年癯瘠改貌天倫之愛  
振古莫儔及俯膺天眷入纂絕業分命懿親台  
牧並建對繁弱以流涕望曲阜而含悲改贈司  
徒因謚為郡王禮也惟公少而英明長而弘潤  
風標秀舉清暉映世學徧書部特善玄言肇悅  
之麗篆籀之則窮六義於懷抱究八體於毫端  
奕思之微秋儲無以競巧取睽之妙流睇未足  
稱奇至公以奉上鳴謙以接下撫僚庶盡盛德  
之容交士林忘公侯之貴虛懷博納幽閑洞開

宴語談笑情瀾不竭譽滿天下德冠生民蓋百代之儀表千載之領袖曾不慙留梁摧奄及豈唯僑終蹇謝興謠輟相而已哉凡我僚舊均哀共戚怨天德之無厚痛棠陰之不留思所以克播遺塵敝之穹壤乃刊石圖徽寄情銘頌其辭曰天命玄鳥降而生商是開金運祚始玉筐三仁去國五曜入房亦白其馬侯服周王本枝派別因萊命氏涉徐而東義均梁徙自茲以降懷青拖紫崇基巖巖長瀾涌涌惟聖造物龍飛天步載鼎載革有除有布高皇赫矣仰膺乾顧景



皇烝哉實啓洪祚喬嶽峻峙命世興賢膺期誕  
德絕後光前幾以成務覺在民先位非大寶爵  
乃上天爰始濯纓清猷濬發升降文陛逶迤魏  
闕惠露霑吳仁風扇越涉夏踰漢政成期月用  
簡必從日新為盛在上哀矜臨下莊敬草木不  
天昆蟲得性我有芳蘭民胥攸詠羣夷蠢蠢巖  
別嶂分傾山盡落其從如雲挈妻荷子負戴成  
羣迴首請吏曾何足云昔聞天道仁罔不遂彼  
蒼如何興山止簣四牡方馳六龍頓轡斯民曷  
仰邦國殄瘁齊殞晏平行哭致禮趙俎昌國列

邦揮涕况我君斯皇之介弟哀感徒庶慟興雲  
陛階毀留攢川汎歸軸競羞野莫爭攀去轂遵  
渚號追臨波望哭無絕終古惟蘭與菊塗田帝  
渚朱軒靡駕東首塋園即宮長夜逝川無待黃  
金難化鐘石徒刊芳猷永謝

讓中書監表

庾亮

臣亮言臣凡庸回陋少無檢操昔以中州多故  
舊邦喪亂随侍先臣遠庇有道爰客逃難求食  
而已不悟邀時之福遭遇嘉運先帝龍興垂異  
常之顧眷同國士又申之婚姻遂階親寵累忝



非服弱冠濯纓沐浴玄風頻繁省闕出總六軍  
十餘年間位超先達無勞被遇無與臣比小人  
祿薄福過灾生止足之分臣所宜守而偷榮昧  
進日爾一日謗讟既集上塵聖朝始欲自聞而  
先帝登遐區區微誠竟未上達陛下踐祚聖政  
維新宰輔賢明庶寮咸允康哉之歌實在至公  
而國恩不已復以臣領中書則示天下以私矣  
何者臣於陛下后之兄也姻婭之嫌實與骨肉  
中表不同雖太上至公聖德無私然世之喪道  
有自来矣悠悠六合皆私其姻者也人皆有私

則謂天下無公矣。是以前後二漢咸以抑后黨  
安進婚族危。向使西京七族東京六姓皆非姻  
黨。各以平進。縱不悉全。決不盡敗。今之盡敗。更  
由姻昵。臣歷觀庶姓在世無黨。於朝無援。於時  
植根之本輕也。薄也。苟無大瑕。猶或見容。至於  
外戚。憑託天地。勢連四時。根援扶疎。重矣大矣。  
而財居權寵。四海側目。事有不允。罪不容誅。身  
既招殃。國為之弊。其故何耶。直由婚媾之私。羣  
情之所不能免。故率其所嫌。而嫌之於國。是以  
䟽附則信。姻進則疑。疑積於百姓之心。則禍成。



重闥之內矣此皆徃代成鑒可謂寒心者也夫  
萬物之所不通聖賢因而不奪冒親以求一才  
之用未若防嫌以明公道今以臣之才無如此  
之嫌而使內處心膺外總兵權以此求治未之  
聞也以此招禍可立而待也雖陛下二相明其  
愚歟朝士百寮頗識其情天下之人何可閉到  
戶說使皆坦然耶夫富貴寵榮臣所不能忘也  
刑罰貧賤臣所不能甘也今恭命則愈違命則  
苦臣雖不達何事背時違上自貽患責耶臣仰  
覽殷鑑量已知弊身不足惜為國永悔是以惶

慙屢陳丹款而微誠淺薄未垂察諒憂懼屏營  
不知所厝以臣今地不可以進明矣且違命已  
久臣之罪又積矣歸駭私門以待刑書願陛下  
垂天地之鑒察臣之愚誠則雖死之日猶生之  
年矣

為蕭楊州作薦士表

任昉

臣聞求賢暫勞垂拱永逸方之䟽壤取類導川  
伏惟陛下道隱旒纁信充符璽六飛同塵五讓  
高世白駒空谷振鷺在庭猶懼隱鱗卜祝藏器  
屠保物色關下委裘河上非取製於一狐諒求



味於蕪采而五聲僊響九工是詢寢議廟堂借  
聽輿皂臣位任隆重義蕪家邦實欲使名實不  
違徵偉路絕勢門上品猶當格以清談英俊下  
僚不可限以位貌竊見秘書丞琅邪臣王暕年  
二十一字思晦七葉重光海內冠冕神清氣茂  
允迪中和叔寶理遣之談彥輔名教之樂故以  
暕暕先達領袖後進居無塵雜家有賜書辭賦  
清新屬言玄遠室通人曠物疎道清養素丘園  
台階虛位庠序公朝萬夫傾望豈徒荀令可想  
李公不忘而已哉前晉安郡侯官令東海王僧

孺年三十五理尚棲約思致恬敏既筆耕為養  
亦傭書成學至乃集螢映雪編蒲緝柳先言往  
行人物雅俗甘泉遺儀南宮故事畫地成圖抵  
掌可述豈直鼯鼠有必對之辨竹書無落簡之  
謬疎坐鎮雅俗弘益已多僧孺訪對不休質疑  
斯在並東序之秘寶瑚璉之茂器誠言以入廢  
而才實世資臨表悚戰猶懼未允不任下情云  
云

答臨淄侯牋

楊脩

脩死罪不侍數日若彌年載豈由愛顧之隆使



係仰之情深耶損辱嘉命蔚矣其文誦讀反復  
雖諷雅頌不復過此若仲宣之擅漢表陳氏之  
跨冀域徐劉之顯青豫應生之發魏國斯皆然  
矣至於修者聽采風聲仰德不暇目周章於省  
覽何遑高視哉伏惟君侯少長貴盛體發旦之  
資有聖善之教遠近觀者徒謂能宣昭懿德光  
贊大業而已不復謂能兼覽傳記留思文章今  
乃舍王超陳度越數子矣觀者駭視而拭目聽  
者傾首而竦耳非夫體通性達受之自然其孰  
能至於此乎又嘗親見執事握牘持筆有所造

作若成誦在心借書於手曾不斯須少留思慮  
仲尼日月無得踰焉脩之仰望殆如此矣是以  
對鵲而辭作暑賦彌日而不獻見西施之容歸  
憎其貌者也伏想執事不知其然猥受顧錫教  
使刊定春秋之成莫能損益呂氏淮南字直子  
金然而弟子籍口市人拱手者賢聖卓犖固所  
以殊絕凡庸也今之賦頌古詩之流不更孔公  
風雅無別耳脩家子雲老不曉事強著一書悔  
其少作若比仲山周旦之疇為皆有譽耶君侯  
忘聖賢之顯迹述鄙宗之過言竊以為未之思



也若乃不忘經國之大美流千載之英聲銘功  
景鍾書名竹帛斯自雅量所素蓄也豈與文章  
相妨害哉輒受所惠竊備矐矐誦詠敢望惠施  
以忝莊氏季緒璫璫何足以云反答造次不能  
宣備脩死罪死罪

答魏太子牋

吳質

二月八日庚寅臣質言奉讀手命追亡慮存恩  
哀之隆形於文墨日月冉冉歲不我與昔侍左  
右廁坐衆賢出有微行之游入有管絃之歡置  
酒樂飲賦詩稱壽自謂可終始相保茲騁材力

效節明主何意數年之間死喪略盡臣獨何德  
以堪久長陳徐劉應才學所著誠如來命惜其  
不遂可為痛切凡此數子於雍容侍從實其入  
也若乃邊境有虞羣下鼎沸軍書輻至羽檄交  
馳於彼諸賢非其任也往者孝武之世文章為  
盛若東方朔枚臯之徒不能持論即阮陳之儔  
也其惟嚴助壽王與聞政事然皆不慎其身善  
謀於國卒以敗亡臣竊耻之至於司馬長卿稱  
疾避事以著書為務則徐生庶幾焉而今各逝  
已為異物矣後來君子實可畏也伏惟所天優



游典籍之場休息篇章之圃發言抗論窮理盡  
微摘藻下筆鸞龍之文奮矣雖年齊蕭王才實  
百之此衆議所以歸高遠近所以同聲也然年  
歲若墜今質已四十二矣白髮生髯所慮日深  
實不復若平生之時也但欲保身勅行不蹈有  
過之地以為知己之累耳游宴之歡難可再遇  
盛年一過實不可追臣幸得下愚之才值風雲  
之會時邁齒齒猶欲觸胷奮首展其割裂之用  
也不勝悽悽以來命備悉故略陳至情質死罪  
死罪

在元城與魏太子牋

吳質

臣質言前蒙延納侍宴終日曜靈匿景繼以華  
燈雖虞卿適趙平原入秦受贈千金浮觴旬日  
無以過也小器易盈先取沈頓醒寤之後不識  
所言即以五日到官初至承前未知深淺然觀  
地形察土宜西帶恒山連岡平代北鄰栢入乃  
高帝之所忌也重以泚水漸漬疆宇喟然歎息  
思淮陰之奇譎亮成安之失策南望邯鄲想廉  
藺之風東接鉅鹿存李齊之流都人士女服習  
禮教皆懷慷慨之節包左車之計而質闇弱無



以蒞之若乃邁德種恩樹之風聲使農夫逸豫  
於疆畔女工吟詠於機杼固非質之能也至於  
奉遵科教班揚明令下無威福之吏邑無豪俠  
之傑賦事行刑資於故實抑亦懍懍有庶幾之  
心往者嚴助釋承明之歡受會稽之位壽王去  
侍從之娛統東郡之任其後皆克復舊職追尋  
前軌今獨不然不亦異乎張敞在外自謂無奇  
陳咸憤積思入京城彼豈虛談夸論詭曜世俗  
哉斯實薄郡守之榮願左右之勤也古今一揆  
先後不貿焉知來者之不如今聊以當覲不敢

多云質死罪死罪

拜中軍記室辭隋王牋

謝朓

故吏文學謝朓死罪死罪即日被尚書召以朓  
補中軍新安王記室叅軍朓聞潢汙之水願朝  
宗而每竭鴛鴦蹇之乘希沃若而中疲何則臯壤  
搖落對之惆悵歧路西東或以鳴啞况乃服義  
徒擁歸志莫從邈若墜雨翩似秋蒂晝實庸流  
行能無筭屬天地休明山川受納褒采一介抽  
揚小善故捨菜場園奉筆兔園東亂三江西浮  
七澤契濶戎旃從容讌語長裾日曳後乘載脂



榮立府庭恩加顏色沐髮晞陽未測涯涘撫臆  
論報早誓肌骨不寤滄溟未運波臣自蕩渤澥  
方春旅翮先謝清切藩房寂寥舊幕輕舟反溯  
吊影獨留白雲在天龍門不見去德滋永思德  
滋深唯待清江可望候歸艗於春渚朱邱方開  
效蓬心於秋實如其簪履或存衽席無改雖復  
身填溝壑猶望妻子知歸攬涕告辭悲來橫集  
不任犬馬之誠

與朝歌令吳質書

魏文帝

五月十八日丕白季重無恙塗路雖局官守有

限願言之懷良不可任足下所理僻左書問致  
簡益用增勞每念昔日南皮之游誠不可忘既  
妙思六經逍遙百氏彈棊間設終以六博高談  
娛心哀箏順耳馳騁北場旅食南館浮甘瓜於  
清泉沉朱李於寒水白日既匿繼以朗月同乘  
共載以游後園輿輪徐動叅從無聲清風夜起  
悲砧微吟樂往哀來愴然傷懷余顧而言斯樂  
難常足下之徒咸以為然今果分別各在一方  
元瑜長逝化為異物每一念至何時可言方今  
蕤賓紀時景風扇物天氣和暖衆果具繁時駕



而游北遵河曲從者鳴笳以啓路文學託乘於  
後車節同時異物是人非我勞如何今遣騎到  
鄴故使枉道相過行矣自愛丕白

與吳質書

魏文帝

二月三日丕白歲月易得別來行復四年三年  
不見東山猶歎其遠况反過之思何可支雖書  
疏徃返未足解其勞結昔年疾疫親舊多離其  
災徐陳應劉一時俱逝痛可言耶昔日將處行  
則連輿止則接席何曾須臾相失每至觴酌流  
行絲竹並奏酒酣耳熱仰而賦詩當此之時忽

然不自知樂也謂百年已分可長共相保何面  
數年之間零落略盡言之傷心頃撰其遺文都  
為一集觀其姓名已為鬼錄追思昔游猶在心  
目而此諸子化為糞壤可復道哉觀古今文人  
類不護細行鮮能以名節自立而偉長獨懷文  
抱質恬淡寡欲有箕山之志可謂彬彬君子者  
矣著中論二十篇成一家之言辭義典雅足傳  
于後此子為不朽矣德璉常斐然有述作之意  
其才學足以著書美志不遂良可痛惜間者歷  
覽諸子之文對之投淚既痛逝者行自念也孔



璋章表殊健微為繁富公幹有逸氣但未道耳  
其五言詩之善者妙絕時人元瑜書記翩翩致  
足樂也仲宣獨自善於辭賦惜其體弱不足起  
其文至於所善古人無以遠過昔伯牙絕絃於  
鍾期仲尼覆鹽於子路痛知音之難遇傷門人  
之莫逮諸子但為未及古人亦自一時之雋也  
今之存者已不逮矣後生可畏來者難誣恐吾  
與足下不及見也年行已長大所懷萬端時有  
所慮至通夜不瞑忘意何時復類昔日已成老  
翁但未白頭耳光武有言年已三十餘在兵中

十歲所更非一吾德不及之年與之齊矣以犬  
羊之質服虎豹之文無衆星之明假日月之光  
動見瞻觀何時易乎恐永不復得為昔日游也  
少壯真當努力年一過往何可攀援古人思秉  
燭夜遊良有以也頃何以自娛頗復有所述造  
否東望於邑裁書叙心丕白

與鍾大理書

魏文帝

丕白良玉比德君子珪璋見美詩人晉之垂棘  
魯之與璠宋之結緑楚之和璞價越萬金貴重  
都城有稱疇昔流聲將來是以垂棘出晉虞虢



雙禽和璧入秦相如抗節竊見玉書稱美玉白  
如截肪黑譬純叅赤擬鷄冠黃侔蒸栗側聞斯  
語未覩厥狀雖德非君子義無詩人高山景行  
私所慕仰然四寶邈焉已遠秦漢未聞有良比  
也求之曠年不遇厥真私願不果飢渴未副近  
日南陽宗惠叔稱君侯昔有美玦聞之驚喜笑  
與抃會當自白書恐傳言未審是以令舍弟子  
建因荀仲茂時從容諭鄙旨乃不忽遺厚見周  
稱鄴騎既到寶玦初至捧匣跪發五內震駭繩  
窮匣開爛然滿目猥以蒙鄙之姿得覩希世之

寶不煩一介之使不損連城之價既有秦昭章  
臺之觀而無蘭生詭奪之誑嘉貺益腆敢不欽  
承謹奉賦一篇以讚揚麗質丕白

與吳季重書

曹植

植白季重足下前日雖因常調得為密坐雖讌  
飲彌日其於別遠會稀猶不盡其勞積也若夫  
觴酌凌波於前簫笳發音於後足下鷹揚其體  
鳳觀虎視謂蕭曹不足儔衛霍不足侔也左顧  
右眄謂若無入豈非吾子壯志哉過屠門而大  
嚼雖不得肉貴且快意當斯之時願舉泰山以



為肉傾東海以為酒伐雲夢之竹以為笛斬泗  
濱之梓以為箏食若填巨壑飲若灌漏卮其樂  
固難量豈非大丈夫之樂哉然日不我與曜靈  
急節面有逸景之速別有參商之闊思抑六龍  
之首頓羲和之轡斬若木之華閉濛汜之谷天  
路高邈良無由緣懷戀反側如何如何得所來  
訊文采委曲曄若春榮瀏若清風申詠反覆曠  
若復面其諸賢所著文章想還所治復申詠之  
也可今喜事小史諷而誦之夫文章之難非獨  
今也古之君子猶亦病諸家有千里驥而不珍

馬人懷盈尺和氏而無貴矣夫君子而不知音  
樂古之達論謂之通而蔽墨翟不好伎何為過  
朝歌而迴車乎足下好伎而正值墨氏迴車之  
縣想足下助我張目也又聞足下在彼自有佳  
政夫求而不得者有之矣未有不求而自得者  
也且改轍易行非良樂之御易民而治非楚鄭  
之政願足下勉之而已矣適對嘉賓口授不悉  
往來數相聞曹植白

與滿公琰書

應璩

璩白昨者不遺猥見照臨昔侯生納顧於夷門



毛公受眷於逆旅無以過也外嘉郎君謙下之  
德內幸頑才見誠知己歡欣踴躍情有無量是  
以奔騁御僕宣命周求陽晝喻於詹何揚倩說  
於范武故使鮮魚出自潛淵芳旨發自幽巷繁  
俎綺錯羽爵飛騰牙曠高徽義渠哀激當此之  
時仲孺不辭同產之服孟公不顧尚書之期徒  
恨宴樂始酣白日傾夕驪車就駕意不宣展追  
惟耿介迄于明發適欲遣書會承來命知諸君  
子復有漳渠之會夫漳渠西有伯陽之館北有  
曠野之望高樹翳朝雲文禽蔽綠水沙塲夷敬

清風肅穆是京臺之樂也得無流而不反乎適  
有事務須自經營不獲侍坐良增邑邑因白不  
悉璩白

重答劉秣陵沼書

劉峻

劉侯既重有斯難值余有天倫之戚竟未之致  
也尋而此君長逝化為異物緒言餘論蘊而莫  
傳或有自其家得而示余者余悲其音徽未沫  
而其人已亡青簡尚新宿草將列弦然不知涕  
之無從也雖隙駟不留尺波電謝而秋菊春蘭  
英華靡絕故存其梗槩更酬其旨若使墨翟之



言無爽宣室之談有徵冀東平之樹望咸陽而  
西靡盖山之泉聞絃歌而赴節但懸劒空隴有  
恨如何

思歸引序

石崇

余少有大志夸邁流俗弱冠登朝歷位二十五  
年五十以事去官晚節更樂放逸篤好林藪遂  
肥遯於河陽別業其制宅也却阻長堤前臨清  
渠栢木幾於萬株流水周于舍下有觀閣池沼  
多養魚鳥家素習技頗有秦趙之聲出則以游  
目戈釣為事入則有琴書之娛又好服食咽氣

志在不朽慨然有凌雲之操歟復見牽羈婆娑  
於九列困於人間煩黷常思歸而永歎尋覽樂  
篇有思歸引儻古人之情有同於今故制此曲  
此曲有絃無歌今為作歌辭以述余懷恨時無  
知音者令造新聲而播於絲竹也

東方朔畫像贊

并序

夏侯湛

大夫諱朔字曼倩平原厭次人也魏建安中分  
厭次以為樂陵郡故又為郡人焉事漢武帝漢  
書具載其事先生瓌瑋博達思周變通以為濁  
世不可以富樂也故薄游以取位苟出不可以



直道也故頡頏以傲世傲世不可以垂訓故正  
諫以明節明節不可以久安也故詼諧以取容  
潔其道而穢其跡清其質而濁其文弛張而不  
為邪進退而不離羣若乃遠心曠度賡智宏材  
侗儻惇物觸類多能合變以明算幽贊以知來  
自三墳五典八索九丘陰陽圖緯之學百家衆  
流之論周給敏捷之辯支離覆逆之數經脉藥  
石之藝射御書計之術乃研精而究其理不習  
而盡其功經目而諷於口過耳而聞於心夫其  
明濟開豁包含弘大陵轡卿相朝西豪傑於龍罩

靡前跽籍貴勢出不休顯賤不憂戚戲萬乘若  
寮友視儔列如草芥雄節邁倫高氣蓋世可謂  
拔乎其萃游方之外者已談者又以先生嘯吸  
冲和吐故納新蟬蛻龍變棄俗登仙神交造化  
靈為星辰此又奇怪惚恍不可備論者也大人  
來守此國僕自京都言歸定省覩先生之縣邑  
想先生之高風徘徊路寢見先生之遺像逍遙  
城郭觀先生之祠宇慨然有懷乃作頌焉其辭

曰

矯矯先生肥遯居真退不終否進亦避榮臨世



濯足希古振纓涅而無滓既濁能清無滓伊何  
高明克柔能清伊何視汙若浮樂在必行處儉  
罔憂跨世凌時遠蹈獨遊瞻望徃代爰想遐蹤  
邈邈先生其道猶龍迹朝隱和而不同棲遲  
下位聊以從容我來自東言適茲邑敬問墟墳  
企佇原隰墟墓徒存精靈永戢民思其歸祠宇  
斯立徘徊寺寢遺像在圖周旋祠宇庭序荒蕪  
穰棟傾落草萊弗除肅肅先生豈焉是居是居  
不形悠悠我情昔在有德罔不遺靈天秩有禮  
神鑒孔明彷彿風塵用垂頌聲

逸民傳論

范曄

易稱遯之時義大矣哉又曰不事王侯高尚其  
事是以堯稱則天而不屈潁陽之高武盡美矣  
終全孤竹之潔自茲以降風流彌繁長往之軌  
未殊而感致之數匪一或隱居以求其志或迴  
避以全其道或靜已以鎮其躁或去危以圖其  
安或垢俗以動其槩或疵物以激其清然觀其  
甘心畎畝之中憔悴江海之上豈必親魚鳥樂  
林草哉亦云介性所至而已故蒙耻之賓屢黜  
不去其國蹈海之節千乘莫移其情適使矯易



去就則不能相為矣彼雖硜硜有類沽名者然  
而蟬蛻囂埃之中自致寰區之外異夫飾智巧  
以逐浮利者乎荀卿有言曰志意修則矯富貴  
道義重則輕王公也漢室中微王莽篡位士之  
蘊藉義憤甚矣是時裂冠毀冕相携持而去之  
者蓋不可勝數揚雄曰鴻飛冥冥弋者何慕焉  
言其遠患之遠也光武側席幽人求之若不及  
旌帛蒲車之所徵責相望於巖中矣若薛方逢  
萌聘而不肯至嚴光周黨王霸至而不能屈羣  
方咸遂志士懷仁斯固所謂舉逸民則天下歸

心者乎肅宗亦禮鄭均而徵高鳳以成其節自  
後帝德稍衰邪孽當朝處子耿介羞與卿相等  
列至乃抗憤而不顧多失其中行焉蓋錄其絕  
塵不反同夫作者列之此篇

宋書謝靈運傳論

沈約

史臣曰民稟天地之靈含五常之德剛柔迭用  
喜愠分情夫志動於中則歌詠外發六義所因  
四始攸繫升降謳謠紛披風什雖虞夏以前遺  
文不覩稟氣懷靈理無或異然則歌詠所興宜  
自生民始也周室既衰風流彌著屈平宋玉導



清原於前賈誼相如振芳塵於後英辭潤金石  
高義薄雲天自茲以降情志愈廣王褒劉向揚  
班崔蔡之徒異軌同奔遽相師祖雖清辭麗曲  
時發乎篇而蕪音累氣固亦多矣若夫平子艷  
發文以情變絕唱高蹤久無嗣響至于建安曹  
氏基命三祖陳王咸蓄盛藻甫乃以情緯物以  
文被質自漢至魏四百餘年辭入才子文體三  
變相如工為形似之言二班長於情理之說子  
建仲宣以氣質為體並標能擅美獨映當時是  
以一世之士各相慕習原其颺流所始莫不同

祖風騷徒以賞好異情故意製相詭降及元康  
潘陸特秀律異班賈體變曹王縉旨星稠繁文  
綺合綴平臺之逸響采南皮之高韻遺風餘烈  
事極江左在晉中興玄風獨扇為學窮於柱下  
博物止乎七篇馳騁文辭義殫乎此自建武暨  
于義熙歷載將百雖比響聯辭波屬雲委莫不  
寄言上德託意玄珠道麗之辭無聞焉耳仲文  
始革孫許之風叔源大變大元之氣爰逮宋氏  
顏謝騰聲靈運之興會標舉延年之體裁明密  
並方軌前秀垂範後昆若夫敷衽論心商榷前



藻工拙之數如有可言夫五色相宣八音協暢  
由乎玄黃律呂各適物宜欲使宮羽相變低昂  
舛節若前有浮聲則後須切響一簡之內音韻  
盡殊兩句之中輕重悉異妙達此旨始可言文  
至於先士茂製諷高歷賞子建函京之作仲宣  
灞岸之篇子荆零雨之章正長朔風之句並直  
舉曾情非傍詩史正以音律調韻取高前式自  
靈均以來多歷年代雖文體稍精而此秘未覩  
至於高言妙句音韻天成皆暗與理合匪由思  
至張蔡曹王曾無先覺潘陸顏謝去之彌遠世

之知音者有以得之此言非謬如曰不然請待  
來哲

思倖傳論

沈約

夫君子小人類物之通稱蹈道則為君子違之  
則為小人屠釣卑事也版築賤役也太公起為  
周師傳說去為殷相非論公侯之世鼎食之資  
明敷幽仄唯才是與逮于二漢茲道未革胡廣  
累世農夫伯始致位公相黃憲牛醫之子叔度  
名動京師且士子居朝咸有職業雖七葉珥貂  
見崇西漢而侍中身奉奏事又分掌御服東方



朔為黃門侍郎執戟殿下郡縣掾吏並出豪家  
負戈宿衛中由勢族非若晚代分為二塗者也  
漢末喪亂魏武始基軍中倉卒權立九品蓋以  
論人才優劣非謂世族高卑因此相沿遂為成  
法自魏至晉莫之能改州郡正以才品人而  
舉世人才升降蓋寡徒以憑籍世資用相陵駕  
都正俗士斟酌時宜品目多少隨事俯仰劉毅  
所云下品無高門上品無賤族者也歲月遷化  
斯風漸篤凡厥衣冠莫非二品自此以還遂成  
卑庶周漢之道以智役愚臺隸參差用成等級

魏晉以來以貴役賤士庶之科較然自辨夫人  
君南面九重與絕陪奉朝夕義隔卿士階闥之  
任宜有司存既而恩以狎生信由恩固無可憚  
之姿有易親之色孝建泰始主威獨運空置百  
司權不外假而刑政糾雜理難遍通耳目所寄  
事歸近習賞罰之要是謂國權出納主命由其  
掌握於是方塗結軌輻輳同奔人主謂其身卑  
位薄以為權不得重曾不知鼠憑社貴狐藉虎  
威外無逼主之嫌內有專用之功勢傾天下未  
之或悟挾朋樹黨政以賄成鈇鉞瘡痍構於林



第之曲服冕乘軒出於言笑之下南金北玉來  
悉方艚素纁丹魄至皆兼兩西京許史蓋不足  
云晉朝王石未或能比及大宗晚運慮經盛衰  
權倖之徒惴惴宗戚欲使幼主孤立永竊國權  
搆造同異興樹禍隙帝弟宗王相繼屠戮民忘  
宋德雖非一塗寶祚夙傾實由於此嗚呼漢書  
有恩澤侯表又有佞倖傳今采其名列以為恩  
倖篇云

典論論文

魏文帝

文人相輕自古而然傳毅之於班固伯仲之間

耳而固小之與弟超書曰武仲以能屬文為蘭  
臺令史下筆不能自休夫人善於自見而文非  
一體鮮能備善是以各以所長相輕所短里語  
曰家有弊帚享之千金斯不自見之患也今之  
文人魯國孔融文舉廣陵陳琳孔璋山陽王粲  
仲宣北海徐幹偉長陳留阮瑀元瑜汝南應瑒  
德璉東平劉楨公幹斯七子者於學無所遺於  
辭無所假咸以自騁騷於千里仰齊足而並  
馳以此相服亦良難矣蓋君子審己以度人故  
能免於斯累而作論文王粲長於辭賦徐幹時



有齊氣然粲之匹也如粲之初征登樓槐賦征  
思幹之玄猿漏卮圓扇橘賦雖張蔡不過也然  
於他文未能稱是琳瑯之章表書記今之雋也  
應瑒和而不壯劉楨壯而不密孔融體氣高妙  
有過人者然不能持論理不勝辭至於雜以嘲  
戲及其所善揚班儔也常人貴遠賤近向聲背  
實又患闇於自見謂已為賢夫文本同而末異  
蓋奏議宜雅書論宜理銘誄尚實詩賦欲麗此  
四科不同故能之者偏也唯通才能備其體文  
以氣為主氣之清濁有體不可力強而致譬諸

音樂曲度雖均節奏同檢至於引氣不齊巧拙  
有素雖有父兄不能以移子弟蓋文章經國之  
大業不朽之盛事年壽有時而盡榮樂止乎其  
身二者必至之常期未若文章之無窮是以古  
之作者寄身於翰墨見意於篇籍不假良史之  
辭不託飛馳之勢而聲名自傳於後故西伯幽  
而演易周旦顯而制禮不以隱約而弗務不以  
康樂而加思夫然則古人賤尺璧而重寸陰懼  
乎時之過已而人多不強力貧賤則懣於饑寒  
富貴則流於逸樂遂營目前之務而遺千載之



功日月逝於上體貌衰於下忽然與萬物遷化  
斯志士之大痛也融等已逝唯幹著論成一家  
言

吊魏武帝文

陸機

元康八年機始以臺郎出補著作游乎祕閣而  
見魏武帝遺令愴然歎息傷懷者久之客曰夫  
始終者萬物之大歸死生者性命之區域是以  
臨喪殯而後悲觀陳根而絕哭今乃傷心百年  
之際興哀無情之地忘者無乃知哀之可有而  
未識情之可無乎機答之曰夫日蝕由乎交分

山崩起于朽壤亦云數而已矣然百姓怪焉者  
豈不以資高明之質而不免卑濁之累居常安  
之勢而終嬰傾離之患故乎夫以迴天倒日之  
力而不能振形骸之內濟世夷難之智而受困  
魏闕之下已而格乎上下者藏于區區之木光  
于四表者翳乎叢爾之土雄心摧于弱情壯圖  
終于衰志長筭屈于短日遠跡頓于促路嗚呼  
豈特瞽史之異闕景黔黎之恠類岸乎觀其所  
以顧命冢嗣貽謀四子經國之略既遠隆家之  
訓亦弘又云吾在軍中特法是也至于小忿怒



大過失不當效也善乎達人之讜言矣持姬女  
而指季豹以示四子曰以累汝因泣下傷哉曩  
以天下自任今以愛子託人同乎盡者無餘而  
得乎亡者無存然而婉孌房闥之內綢繆家人  
之務則幾乎密與又曰吾媿好妓人皆著銅雀  
臺于臺堂上施八尺牀張繡帳朝晡上晡繡之  
屬月朝十五輒向帳作妓汝等時時登銅雀臺  
望吾西陵墓田又云餘香可分與諸夫人諸舍  
中無所為學作履組賣也吾歷官所得綬皆著  
藏中吾餘衣裘可別為一藏不能者兄弟可共

分之既而竟分焉亡者可以勿求存者可以勿  
違求與違不其兩傷乎悲夫愛有大而必失惡  
有甚而必得智慧不能去其惡威力不能全其  
愛故前識所不用心而聖人罕言焉若乃繫情  
累于外物留曲念于閨房亦賢俊之所宜廢乎  
于是遂憤懣而獻吊云爾  
接皇漢之末緒值王塗之多違行重淵以育鱗  
撫慶雲而邀飛運神道以載德乘靈風而扇威  
摧羣雄而電擊舉勍敵其如遺指八極以遠略  
必翦焉而後綏釐三才之闕典啓天地之禁闡



舉脩綱之絕紀紐大音之解微掃雲物以貞觀  
要萬塗而來歸丕大德以宏覆援日月而齊暉  
濟元功于九有固舉世之所推彼人事之大造  
夫何往而不臻將覆簣于浚谷擠為山乎九天  
苟理窮而性盡豈長筭之所研悟臨川之有悲  
固梁木其必顛當建安之三八實大命之所艱  
雖光昭于曩載將稅駕于此年惟降神之繇邈  
眇千載而遠期信斯武之未喪膺靈符而在茲  
雖龍飛于文昌非王心之所怡憤西夏以鞠旅  
汭秦川而舉旗踰鎬京而不豫臨渭濱而有疑

冀翌日之云瘳彌四旬而成災詠歸塗以反旆  
登峻澠而竭來次洛汭而大漸指六軍曰念哉  
伊君王之赫奕寔終古之所難威先天而蓋世  
力蕩海而拔山厄奚險而弗濟敵何彊而不殘  
每因禍以禔福亦踐危而必安迄在茲而蒙昧  
慮噤閉而無端委軀命以待難痛沒世而永言  
撫四子以深念循膚體而續歎迨營魄之未離  
假餘息乎音翰執姬女以嘯痺指季豹而濯馬  
氣衝襟以嗚咽涕垂睫而沈瀾違率土以靖寐  
戢彌天乎一棺容宏度之峻邈壯大業之允昌



思居終而恤始命臨沒而輦揚援貞客以其悔  
雖在我而不減惜內顧之纏綿恨末命之微詳  
紆廣念于履組塵清慮于餘香結遺情之婉孌  
何命促而意長陳法服于帷塵陪窈窕于玉房  
宣備物于虛器發哀音于舊倡矯感容以赴節  
掩零淚而薦觴物無微而不存體無慧而不亡  
庶聖靈之響像想幽神之復光苟形聲之翳沒  
雖音景其必藏徽清絃而獨奏進脯糒而誰嘗  
悼總帳之冥漠怨西陵之茫茫登雀臺而岸悲  
貯美目其何望既晞古以遺累信簡禮而薄葬

彼裘紱于何有貽塵謗于後王嗟大憲之所存  
故雖哲而不忘覽遺籍以慷慨獻茲文而淒傷

祭古塚文

謝惠連


東府掘城北塹八丈餘得古塚上無封域不用  
塼甃以木為槨中有二棺正方兩頭無和明器  
之屬材瓦銅器有數十種多異形不可盡識刻  
木為人長三尺可有二十餘頭初開見悉是人  
形以物槩撥之應手灰滅棺上有五銖錢百餘  
枚水中有甘蔗節及梅李核瓜瓣皆浮出不甚  
爛壞銘誌不存世代不可得而知也公命城者



改埋於東岡祭之以豚酒既不知其名字遠近  
故假為之號曰冥漠君云爾元嘉七年九月十  
四日司徒御屬領直兵史統作城錄事臨漳令  
亭侯周林具豚膠之祭敬薦冥漠君之靈忝總  
徒旅版築是司窮泉為壑聚壤成墓一槨既啓  
雙棺在茲捨畚淒愴縱鋪連而芻靈已毀塗車  
既摧几筵糜腐俎豆傾低盤或梅李益或醢醢  
庶傳餘節瓜表遺犀追惟夫子生自何代曜質  
幾年潛靈幾載為壽為夭寧顯寧晦銘誌堙滅  
姓字不傳今誰子後曩誰子先功名義惡如何

蔑然百階皆作十仞斯齊壙不可轉漣不可迴  
黃腸既毀便房已頽循題興念撫俑增哀謝聲  
垂仁廣漢流渥祠骸府阿掩骼城曲仰羨古風  
為君改卜輪移北隍窀穸東麓壙即新營棺仍  
舊木合葬非古周公所存敬遵昔義還祔雙魂  
酒以兩壺牲以特豚幽靈髣髴飲我犧樽嗚呼  
哀哉





旬題

論表一賦詩三

①

之亥九月錦宮

量地論

擬本朝羣臣賀設尊賢堂以延宿典隱淪之士表

余既樂其風俗之淳而吏吏亦安余之拙詩押余解趙些臺記

縣人董生自南隱居行義於其中詩押義解董生行

布衣韋帶室窮處草屋坐誦書史常恨不見用詩押解啟文上范司諫書

髮之白者日以反黑賦解些些臺記

刺史不能薦賦解董生行

今天子躬親庶政化理清明賦解上范司諫書



年應方決為平生不世方

昌基生順叔起脆生一旺方入葬大忌又法曰差水口五  
巳丙午水年戌乾亥壬子火也

不偏死亡在綿上富亦逢國壬亥亥武丙亥亥物亥亡凶命為五德水  
正足假金也庚年以丙子起之庚年子合官旺收乙年子自

